

SOKONG MEMBAWA ROBOH

PERKARA MENDAFTARKAN KERAKYATAN PERSEKUTUAN TANAH MELAYU

Terbit daripada suatu perbiacaraan yang berlaku di dalam Perak di dalam mana dikatakan bahawa seorang Cina yang baru datang ke Semenanjung Tanah Melayu dalam dua bulan telah mendapat surat kerakyatan Persekutuan Tanah Melayu maka hal yang demikian itu jika benar akan menjadi satu bukti yang nyata bagaimana longgarnya penyiasatan tentang siasah hal-hal yang berkenaan dengan menjadikan kerakyatan Persekutuan Tanah Melayu itu yang sedang berjalan yang kesannya jika tidak diselidiki dengan saksama harus akan merugikan kepada orang-orang Melayu dan sebab itulah perkara yang sedemikian ini sepatutnya mendapat perhatian yang luas dan saksama, terutamanya oleh pegawai-pegawai Melayu di dalam Persekutuan Tanah Melayu.

SANGAT MUDAH?

(oleh Ahmad Lutfi)

Sebagaimana dimaklumi bahawa di dalam Persekutuan Tanah Melayu pada masa ini sedang dijalankan pekerjaan untuk mendaftarkan mereka-mereka yang meminta menjadi rakyat Persekutuan Tanah Melayu yang telah tersedia di situ beberapa soal-soal yang di antaranya orang-orang yang meminta itu disyaratkan hendaklah mengetahui Bahasa Melayu. Adalah dikatakan bahawa kebanyakan daripada pegawai-pegawai yang menjalankan pendaftaran itu ialah pegawai-pegawai sementara yang daripadanya tidak pula terlatih atau terukur untuk menentukan perkara-perkara yang memuaskan hal-hal yang tersebut yang dengan kerananya haruslah menjadikan pendaftaran itu tidak cukup mendapat selidik yang saksama di dalam jalan-jalan pekerjaannya.

Telah dikatakan juga oleh punca-punca yang hampir dalam perkara ini bahawa untuk mendapatkan Federal Citizen itu adalah tersangat mudah. Seseorang yang hendak menjadi seorang rakyat Persekutuan Tanah Melayu itu setelah mengisi borang-borangnya dan diberi akaun oleh dua orang dan setelah disoal berkenaan dengan Bahasa Melayu

maka tidak lama orang-orang itu akan disetujui dan disahkan menjadi seorang rakyat Federal dengan tidak lagi mereka itu dikehendaki disiasat apakah sebenar-benarnya mereka itu layak menjadi rakyat Persekutuan Tanah Melayu mengikut syarat-syarat yang dikehendaki yang termaktub di dalam perjanjian Persekutuan Tanah Melayu itu.

Dengan cara-cara yang demikian itu, jika benar keterangan-keterangan yang saya dapat, maka tak dapat tiada seseorang yang hanya tau berkata sepatah dua Bahasa Melayu ataupun yang tau hanya, bercakap lua gua sahaja dengan tidak cukup faham kepada Bahasa Melayu dengan mudah boleh diterima terutamanya pula dengan sebab pegawai-pegawai yang menjalankannya itu sendiri pun mendatangkan pertanyaan umpamanya – “Lu mana datang” – dengan bahasa-bahasa yang tidak boleh dinisbahkan sebagai Bahasa Melayu sudah tentu yang demikian itu tidak akan mengikuti syarat-syarat Bahasa Melayu yang dengannya membuka dengan luasnya atau memberi peluang dengan luasnya kepada anak-anak dagang yang baru empat lima tahun duduk di sini berhak menjadi rakyat Persekutuan Tanah Melayu dengan tidak terganggu atau terkawal oleh sebarang undang-undang yang meliputi dan dengan demikian tidaklah hairan kalau ada

orang yang mengatakan tidak ada sebuah kerajaan
di dalam dunia ini yang semudah kerajaan Persekutuan
Tanah Melayu memberi hak kerakyatan kepada orang-orang yang
bukan daripada rakyat Persekutuan Tanah Melayu.

Saya tidak menafikan bahawa anak-anak dagang yang duduk
di Melaka umpamanya yang fasih bercakap Melayu atau akan
tidak dapat meliputi syarat yang tersebut tetapi yang menjadi
musyikil ialah bagaimana, sebagaimana yang telah terjadi
seorang yang baharu dua tiga bulan di sini telah dapat
menerima sijil kerakyatan Persekutuan Tanah Melayu yang sudah
tentulah perkara-perkara yang sedemikian ini tidak akan timbul
sekiranya pekerjaan “tumbuk rusuk” tidak berjalan.

Dengan apa-apa yang tersebut di atas ini dapatlah kita
membawa hujah, daripada apa-apa yang telah disampaikan, bahawa
cara mentadbir kerakyatan Persekutuan Tanah Melayu
itu sebenarnya tidak memuaskan oleh kerana yang demikian itu
adalah sangat longgar sedang kesannya adalah boleh dimaknakan
membuka pintu seluas-luasnya kepada anak-anak dagang menjadi
rakyat Persekutuan Tanah Melayu hal yang mana adalah wajib
dikawal oleh kerana langkah-langkah yang demikian itu berbahaya
kepada keselamatan dan kesejahteraan orang-orang Melayu.

Kalau kita perhati cara-cara yang berjalan bagaimana
seseorang yang hendak menjadi kerakyatan British maka
tiap-tiap seseorang yang hendak mengambil kerakyatan itu
selain daripada mengisi borang-borang yang biasa diisi dengan
diakui oleh empat orang rakyat British yang dipercayai
maka ia hendaklah disiasat adakah sebenarnya ia cukup
berkelayakan di dalam bahasa Inggeris dan kemudian
keadaannya hendaklah disiasat dengan saksama oleh Jabatan Penyiasat
Khas Polis tentang perangai dan hal ehwalnya, adakah
ia meliputi segala kehendak-kehendak yang disyaratkan itu dan
kemudian daripada mengambil sumpah maka keadaan itu hendaklah
disahkan lagi oleh suatu jabatan yang tertentu dan
baharulah boleh diterima, itupun setelah berjalan mengambil
masa lima enam bulan lamanya dan terkadang-kadang hingga
bertahun-tahun – tidak sebagaimana yang berlaku atau berjalan
di Persekutuan Tanah Melayu.

Belilah Sekarang



Loteri untuk khidmat masyarakat dan kebajikan yang berharga \$1.00
sedang dijual
di mana-mana pejabat pos.
Loteri yang berhadiah satu juta ringgit pada
kali yang ketiga.
Akan dicabut di Pulau Pinang pada 15 Disember 1951.
Cuma sejuta tiket sahaja yang dijual.
Belilah sekarang. Tuan harus memenangi hadiah yang tertalam \$250000

*Yang tertera di atas ini ialah siaran berkenaan dengan
loteri yang ditulis dengan huruf Jawi yang bolehlah
disifatkan untuk menggalakkan orang-orang Islam membeli loteri.*

-----*-----*

Dengan membandingkan kepada perkara-perkara yang tersebut ini
moleklah kiranya pegawai-pegawai ataupun raja-raja Melayu supaya
memikirkan cara-cara yang munasabah di dalam perkara ini yang
satu daripadanya, menurut pandangan saya, untuk keselamatan
orang-orang Melayu pada masa yang akan datang supaya diadakan
satu-satu kawalan yang lebih ketat di dalam perkara ini yang
daripadanya mustahak sungguh dilantik satu badan yang berkuasa
untuk menerima sebarang permohonan itu yang dengannya akan
menjauhkan pekerjaan-pekerjaan “tumbuk rusuk” yang harus
telah banyak berlaku di mana-mana di Persekutuan Tanah Melayu bagi
meluaskan seseorang itu menjadi rakyat Persekutuan
Tanah Melayu dengan sebegitu mudah yang kesannya sudah tetap akan
menenggelamkan orang-orang Melayu dalam lingkungan anak-anak dagang

dan membuka dengan seluas-luasnya pekerjaan “tumbuk rusuk” yang haram itu berjalan dari satu masa ke suatu masa.

-----*-----*

-----*-----*

LOTERI KERAJAAN

Loteri kerajaan sedang berjalan di Persekutuan Tanah Melayu. Loteri itu diadakan dengan tujuan untuk kebajikan masyarakat umum. Duli-duli Yang Maha Mulia Sultan-sultan di Persekutuan Tanah Melayu telah diminta supaya berkenan kepada tujuan-tujuan loteri itu dan mereka itu dikatakan telah memperkenankan kehendak-kehendak mengadakan loteri itu dengan bersyarat, tidaklah orang Islam digalakkan membeli loteri yang tersebut – yakni tidak ada suatu langkah yang bertujuan orang-orang Islam tergalak membeli loteri itu.

Tidaklah tujuan saya di sini hendak menulis tentang hukum berkenaan dengan loteri yang haramnya sudah sebegini terang tetapi tujuan saya di sini menulis ialah bagaimana janji sudah tidak ditepati lagi dengan kerana pentadbir-pentadbir loteri telah pun menggalakkan orang-orang Islam membelinya dengan bukti yang nyata sekali ada disiarkan dalam siaran-siaran yang bertulis dengan huruf Melayu telah pun ditaburkan di sana sini di serata-serata – tidakkah ini sudah melanggar janji dan akuan kepada Duli-duli Yang Maha Mulia Sultan? Tidakkah ini boleh disifatkan suatu penggalak kepada orang-orang Islam membeli loteri itu ?

Orang awam mengetahui bahawa salah satu daripada

tujuan-tujuan loteri itu diadakan, tidak lain dan tidak bukan untuk kebajikan masyarakat tetapi kalau dilihat kepada wang-wang lebih sebanyak \$26,000,000 itu tidaklah munasabah lagi diadakan kerana kebajikan masyarakat sedang sebagai seorang Islam dan juga saya percaya Sultan-sultan dan penasihat-penasihatnya daripada orang-orang yang beragama Islam dan berperasaan Islam sudah tentu mengetahui bahawa perbuatan-perbuatan membuat barang-barang yang haram itu akan terkena qisasnya kepada umum dan sebab itulah sudah tiba masanya bahawa yang demikian itu semolek-moleknya tidak dijalankan lagi.

Walaubagaimanapun, sekurang-kurangnya perbuatan menggalakkan orang Islam yang telah dilakukan itu patutlah ditempelak oleh Duli-duli Yang Maha Mulia Sultan sebagai perbuatan “mungkir janji” yang boleh dijadikan hujah bahawa perbuatan itu seolah-olah mempermain-mainkan taraf Duli-duli Yang Maha Mulia Sultan itu.

Mudah-mudahan hak yang demikian ini mendapat perhatian supaya sesat dijalani balik ke pangkal – hutang dibayar janji ditepati adanya.

Kalau tak dapat kita menolong orang ini hari, jangan kita katakan “sayang! kalau kelmarin tuan datang tentu sudah saya tolong” kerana menolong orang dengan cara begini, tidak ada orang yang tidak boleh.

Kalau betul mereka hendak menolong, lebih baik kita katakan : “Kalau esok (atau lusa) tuan datang tentu saya akan tolong tuan.”

Ini ialah pakaian perempuan di Mesir – pakaian ini tidak mengikut pakaian secara Islam dan pakaian cara inikah yang kita kejar untuk menuntut kemajuan?!

